

**Zeitschrift:** Igl Ischi : organ della Romania (Societat de Students Romontschs)

**Herausgeber:** Romania (Societat de Students Romontschs)

**Band:** 48 (1962)

**Artikel:** Christianus Caminada : uestg de Cuera (6.1.1876-18.1.1962)

**Autor:** Maissen, Alfons

**DOI:** <https://doi.org/10.5169/seals-882262>

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 30.07.2025

**ETH-Bibliothek Zürich, E-Periodica, <https://www.e-periodica.ch>**

# Veta ed ovra de dus prominentes Romontschs


Christianus Caminada, uestg de Cuera

6.1.1876—18.1.1962

Ils 18 de schaner 1962 ei nies cau diocesan Christianus Caminada spartius da questa veta ell'aulta vegliadetgna de 86 onns. Igl ei stau ina veta plein laver e premura en favur de nossa baselgia, a pro della giuventetgna, dil progress social, digl art e de nies lungatg matern. Siu plaid, sias scartiras vegnan a restar en memoria a novas generaziuns. De vuler era mo skizzar sia ovra e ses merets dess in entir cudisch.

Rest Giusep Caminada ha aviert ses egls per l'emprema gada da Buania 1876 egl uclaun de Surin, entadem la Lumnezia, nus punctuein: «aviert ses egls», pertgei paucs han fatg diever de quei senn en aschi perfetga moda, engartau e priu en egl, ed era suandau la steila dils Sabis cun la pli gronda consequenza tochen alla fin de siu viadi terrester.

Surin, situaus sillla vart dretga dil Rein de Vrin, appartegn ensemens culs dus Pruastgs alla vischnaunca de Lumbrein. Mo il contact cun Vrin, ch'era de contonscher tgunsch davosenasi, ei adina staus ferms denter vitgs ed uclauns d'entadem Lumnezia. Aschia ha il giuven Rest Giusep viviu, schegie empau isolaus e giud via, en in stupent contuorn, spuretg, mo stignaus da cultura, pleins de veta purila, cun abundonta tradiziun ecclesiastica e profana de vaglia. Il contact cun Glion dalla vallada neuadora prendeva adina pli viva art e part dil barhar e trafficar general entras megliers straduns, stinschentond dil tut quasi il viv cunfar de pli baul sur Diesrut e Greina neuasi dallas valladas dil sud. Negin che sa snegar per la part d'entadem Lumnezia influenzas culturalas, etnograficas e de pievel, derivontas els temps passai neuasi dal sud. L'excavaziun d'artefax millenars a Crestaulta



Sia Excell. Msgr. dr. Christianus Caminada  
Uestg de Cuera

dat perdetga d'in centrum d'antichissima cultura indigena che survarga per bia tuttas aspectativas. A talas preiusas cattadas astg'ins senza dubi aschunscher l'anflada della Canzun de s. Margriata 1931 sin terren litterar e musical a Pruastg-dado. Per quella ha Caminada acquistau pli tard gronds merets, sper Caspar Decurtins e Hanns in der Gand.

En quest ravugl ei Rest Giusep Caminada da pign ensi vengnius deitaus viaden ella praula, ella detga, ellas cardientschas popularas, en sia tschontscha vernacula. Che il svegliau mattet danova gleiti il meglier raquintader en scola, presentond praulas e detgas udidas en famiglia, dad augs, ei buca de smarvegliar. Mo era la litteratura arva in'impurtonta porta a siu intelletg, survegnend neuaden da Glion da siu bab ils Cudischs de legendas. Cun quella lectura fageva el sparir il temps, pertgirond in fraret s'entardaus en tgina, duront ch'ils geniturs eran leuora sil funs. El ha era caschun de surpassar ils confins de sia vischnaunca. La Passiun de Lumbrein ha el viu da pignet ensemes cun sia mumma, che alzava el sur ils tgaus della massa ora, explicond las culminaziuns dell'acziun religiusa, las persunas las pli interessantas e caracteristicas.

Igl ei buca de smarvegliar che quei allert e scort mattet vegn tarmess a scola ordeifer il vitg, a Mustér, a Nossadunnaun, en in collegi salesian ad Alassio, ella Riviera taliana, danunder che sia gronda simpatia per l'italianitat deriva, in liug che ha pli tard adina puspei carmalau el en sias vacanzas, era ensemes cun siu amitg Sur prof. Gion Cahannes. 1897 entra Caminada el Seminari de s. Gieci a Cuera, 1900 vegn el consecraus da uestg Fidelis Battaglia, celebrescha sia messa nuviala a Vrin per vegnir tarmess in onn pli tard viado ella pastoraziun. Da 1901—05 entscheiva sia lavur de pastur dellas olmas a Dardin, fracziun beinsituada e fritgeivla della vischnaunca de Breil, cul vegl Caprè, ornaus cun ina statteivla casa-pervenda en lenn, cun da lezzas uras la stanza de scola suten, che surveva era de refugi per far vischnaunca en dis freids e de plievgia. La casa-pervenda plazzada avon porta santeri e piercen baselgia, ina unitad magnifica onsum la teissa spunda, cun splendid ruaus e vesta grondiusa e frontala vi encounter Sursaissa, dalla val siado e giuado tocca dem, sur il Péz Mundaun, Crap, Sezner e Titschal, encounter las tschemas della pézza vi sur tut ora, s'imaginond el zuppau e schurmegiau la Lumnezia cun ils bials vitgs ed uclauns.

Sper sia laver de pastoraziun ha Christianus Caminada anflau baul la via e la pissiun per igl art profan ed ecclesiastic che semanifestava dapertut en nossas valladas per egls aviarts. Quei art era penetraus en siu intern gia da mattet entras siu grondius contuorn de Vrin e Lumbrein cun tonta cultura religiusa e purila. Ussa arriva denton il stadi della paregliaziun; e contas caussas edificontas selaien ussa pareglier e mirar sin sulom de sia emprema pleiv, ella vischnaunca de Breil, suenter a Sursaissa, a Trun ed a Mustér, en sias frequentas spassegiadas tras cultura e tiara romontscha? Mo era il plaid romontsch, la glieud de siu pèr che representava quella nobla faviala en moda schi naturala e solida, la litteratura orala e scretta, daventan siu plascher e siu confiert. Tut quellas enconuschiantschas ha el empruau de duvrar en sia pastoraziun. E sche nus dein ina survesta sur de siu patertgar e luvrar continuau, vesein nus co tut ha surviu en grondissima moda a siu intent primar. Tut quei ch'el lavura sper sia pastoraziun sin terren cultural, metta el sut il migeivel giuv pli ault, sut quel della religiun e ductrina cristiana. Gie schizun ils studis sur il cult paganil han en sesez quella fin e mira. Quei tuna paradox, mo constat als fatgs.

Duront sia pastoraziun a Sursaissa ed a Trun prendan fuorma, sper enzacontas outras scartiras pli pintgas sur las cumpignias de mats, sur P. Plazidus a Spescha ed outras, duas raquintaziuns de lungatg genuin che tradescha beinduras siu origin lumnezian. Igl ei «**La sclavinada**», 1911, e «**Spinas punschans**», 1915, omisduas comparidas egl Ischi, organ della Romania, pli tard restampadas en Tschespet 22, 1942, edius da prof. dr. Gion Cahannes, fundatur de quella collecziun. Schegie de pulit different cuntegn, han omisduas raquintaziuns intent educativ. Las experienzas de veta d'in spiritual presentan cheu certs problems e prighels ch'ein d'evitar en lur entschattas per evitar catastrofas pli grondas. La cardientscha memia superficiala enten carstgauns de schliet ed ambiuzius caracter, cun inschign surplidader e de bahaultscha, meina alla perdizion en La sclavinada. Las consequenzas della letg mischedada vegn demonstrada en tuts ses detagls en Spinas punschans.

A Dardin veva il giuven plevon Caminada survegniu in bi di in'aulta viseta. Ei era negin auter che Caspar Decurtins, sco adina cargaus cun biars problems e cun bia plans sin rucca. Volum 1,2,3 e 5 della Crestomazia eran gia compari da quei temps, e 6 e 7 sin via, e novas preparaziuns basignav'ei per la continuaziun,

novs gidonters per tener pétg al tempo maisudiu mess en rocla tochen lura da Decurtins. El veva festisau ed engartau in'unfrenda nova o sil Crest Caprè a Dardin, in uerbel e ferm spért cun egliada vasta e cun perseveronza, dirs e zais, pertgei mo glieud de buna gnarva saveva resister al temperament ed al tempo de lavur d' in Decurtins. A tals de siu pèr bettev'el en stiva buordis cudischs de si'atgna ed ord autras bibliotecas, e scheva palitgar ses novizs sin veta e mort vid jarva nova. Cun tals gidonters saveva el beinduras era esser galants e della mongia largia, ed ina entira retscha d'intelligents giuvens ein seprofitai grondamein de siu ferm impuls, luvrond cun e sper el. Bein en emprema lingia ei il giuveng plevon Caminada seprofitaus che va lu beingleiti, 1905, a Sursaissa en novas e tut differentas relaziuns, vi sil bi plato e biala spunda umbrivauna, cun auter lungatg e cun glieud d'auter caracter ell'enclava dils Gualsers. 1912 per dir cun Dante, se Rabetscha Caminada «in mezzo del cammin di nostra vita», cun circa 35 onns, a Trun, el center della Cadi, cun grondas incumbensas pastoralas, las qualas Rest Giusep Caminada damogna meisterilmein, sededicond era als problems urgents dils giuvens e giuvinas, dellas cumpignias de mats, allas uniuns mistergneras cun lur novs problems socials. Ils 35 onns che Dante, poet e scribent veneraus zun fetg da Caminada, pren per «mesa veta» dil carstgaun, ha Caminada teniu tras cun bravura, ed el duei ver detg cun 70: «tochen ussa eis ei iu stedi ensi, ed ussa ton scoi po agrado! —»

A Trun veva Sur Caminada caschun de s'entupar en casa Decurtins jamna per jamna cun siu mussader, era savens ensemble cun autras aultas visetas neuasi dalla Svizzera e dagl exteriur. Cheu naschevan novs plans per lavurs culturalas e linguisticas, dev'ei interessants discuors politics, socials e religius. A Trun neschan ses emprems 2 cudischs, sur Ils zenns (Bündner Glocken, 1915) sviluppaus d'ina bugen legida lavur en romontsch Nos zenns, comparida en Ischi 14, 1912, e sur Ils santeris (Bündner Friedhöfe, 1918), carschius d'in artechel de ca 2 artgas en Ischi 12, 1910. Gia a Sursaissa vevan ils emprems studis de tala tempra priusia entschatta. Leu vevan era interessants baghetgs purils dau talien alla descripziun sur la casa sursilvana, Ischi 11, 1909.

Gia ellas introducziuns de queste dus cudischs vesein nus intent e tendenza el scriver futur dil giuveng scienziat, tgei divers problems che vegnan ad occupar el il pli fetg. En viarva quasi romantica, plein fervur plaida Caminada en favur della cultura

veglia e sia bellezia artistica, dils purtaders e scaffiders de quella, dend en contrast d'entellir la paupradad niua dellas tuors d'itschal modernas dils novs stabiliments electrics che seplontan toc per toc tras nossas pli bialas contradas. Quels utschacs sbar-gatonts senza olma, pareglia el cullas stupentas tuors baselgia che sesaulzan sur casas e baghetgs de nos vitgs ed uclauns siadora. Mo era la valetaziun della natira enten la quala la cultura ei tschentada viaden aschi bein, la reproducziun artistica de natira, cultura, sentiments humans, profans e religius sco expressiun artistica d'in maletg per semeglia de Giovanni Segantini, laian percorscher il solid patertgar de Caminada, renviond da l'autra vart detschartamein tuttas emprovas de sgurdinament, seccaturas e profanaziun de talas valurs nunballucontas. Ch'el drova era products litterars e poetics en lungatg romontsch ed en viarvas jastras per sustener sias tesas, secapescha da sesez.

En quella perioda de lavur e stenta a Trun, croda 1916 la mort de Caspar Decurtins. Diesch volums della Crestomazia ed in supplement eran sin cruna. Ei vess dau en quei mument negina persuna pli adattada che plevon Rest Giusep Caminada per metter a buna fin l'ovra de Decurtins. Cun igl agid de vieua Maria Decurtins, comparan 1917 e 1919 ils davos dus volums, 11 e 12 della Crestomazia.

Scret quels cudischs e studis parentai sur ils zenns ed ils santeris, e suenter haver ediu ils dus volums della Crestomazia cun solidas introducziuns, ed enconuschents dapertut per sias oreifras qualitads, vegn Sur Caminada clamaus da uestg Schmid de Grüneck 1919 a Cuera sco plevon catedral. 1932 daventa el decan, 1934 vicari general e 1941 vegn el alzaus silla sedia episcopala. Era en quei temps ded aults e grevs uffecis, ha Chr. Caminada mai bandunau dil tut la via della scienzia, e quei en plaid e scartira. Penetraus dagl art ecclesiastic, ha el acquistau gronds merets per la restauraziun de baselgias, cunzun della Catedrala a Cuera e della baselgia de s. Glieci. Nundumbreivels ein ses cussegls en quels fatgs. En contact cun gronds sciensiats digl art eis el car-schius ad in crescher en savida respectiva. Pli tard ha el era publicau plirs impurtonts studis sur igl art figural ed architectonic.

Sco nunseparabel amitg e gidonter de Casper Decurtins, era Caminada entraus ella materia della Crestomazia sco paucs au-ters. Dall'influenza de quella intensiva occupaziun neschan novas

ideas, novas combinaziuns d'erudiziun, promovidas legend savens ovras scientificas e folcloras de nossa e d'autras tiaras. Quels vasts studis han caschunau pliras lavurs en lungatg tudestg e ro-montsch, cunzun sur ils cults paganils en Rezia, sco per semeglia: 1930 cult dell'aua, 1933 cult dil fiug, 1935 cult dil crap, 1937 ils cults dils animals, cult de plontas e cultira. Cun quellas lavurs ha Caminada empruau de vegnir empau pli datier dil patertgar paganil de nos perdavons d'avon melli onns. Igl ei gie enconuschenet che il cristianissem perdegaus els emprems tschentaners de noss' era, ha buca pudiu penetrar tras la tschaghera paganila tuttenina; ei ha dau retenidas, cunterfridas, decepziuns, ei ha duvrau tschentaners per transprmar dil tuttafatg ils spérts ed entelletgs. Il sentiment religius-cristian sedivergeva gie considerablamein da contrada a contrada, da diocesa a diocesa. Ins ha stuiu far bufatg, schar als pagauns lur idols, lur tempels, empruond de dar a lur cults paganils in tec alla gada il spért cristian. Savens eran las viultas a fritgeivlas conversiuns mo pusseivlas entras semegliants sabis cussegls davart dals uestgs e superius a lur spirituals enameiez la heiclia lavur de converter. Era tier grondas personalitads de num e pum cristian penetrava ed erumpeva adina puspei la tempra paganila en lur fatgs e patratgs. La battaglia denter spért e pratica paganila e cristiana, era el temps-miez tumpriv savens vivs e hanaus, tuttavia existenta en lutga primara e ferventa. Aunc oz ein restadas las cardientschas blauas, elements de tutta natira en detgas, praulas, versets, usits etc. Els ein oz tuttavia buca caschun de combats ed han pauca influenza sin terren religius, anzi, statueschan in interessant fatg per la scienzia, surveschan d'elements per eruir pli profundamein il stgir vargau e la moda de penetrazion cristiana. Il problem de restonzas paganilas ella litteratura orala ed el carstgaun modern ha piars oz sia prigulusadad; el ei buca de pareglier cul prighel digl schi-numnau paganissem modern dell'indifferentadad e digl ateissem de nos tschentaners. Uestg Caminada era totalmein pertscharts de quei stadi, mo leva da l'autra vart tuttavia buca bagatellisar l'influenza de restonzas de patratg paganil aunc d'anflar en nies patertgar, e quei senza ch'il singul fetschi persenn!

La Crestomazia era sco fatga e predestinada per furnir agl erudit crap sin crap, fragment sper fragment per siu baghetg gagliard. L'energia de Monsignur Caminada, sia moda de pegliar a mauns ils problems senza tralasch, han mai schau el a

mesa via, anzi, gidau a surventscher las grondas difficultads, il pugn miert, che sepresenta meinsvart duront talas lavurs.

Era sco uestg ha Christianus Caminada buca tralaschau de continuar e d'intensivar cunzun las retschercas sin terren retic davart reminiscenzas paganilas restadas en lungatg, en sculpturas, en segns misterius sin crappa ed inscripziuns. Nus astgein dir senza dar memia fetg sperasgiu, che Caminada seigi daventaus en quella scienzia in pionier! El ha viu las pusseivladads, attaccau ils problems curaschusamein. El ei sefatgs digns della ierta surprida da Decurtins, fullond ditg tut persuls via sin in intschess grevs e pesonts, cuvretgs da spess vels e brentinas. Quei che Rob. de Planta ha fatg sin terren linguistic, emprova Caminada de scarplir sin intschess de veglias tradiziuns oralas, vegls documents ed inscripziuns. Gitg persuls sco exclusiv scrutinader en quella direcziun, anfla el per in tschancun de sia veta en Ser dr. Hercli Bertogg in cumpogn de viadi. Quella nova speronza ha denton stuiu ceder mo memia baul al destin, suenter haver compilau entgins remarcabels studis, beneventai ed apprezzai generalmein dal mund scientific e cunzun dagl amitg ed enviader Caminada. La scienzia che Caminada ha realisau, sebasa sin biaras disciplinas. El ha dau il «via», ed auters specialists vegnan a stuer continuar en pliras direcziuns.

Era en ses studis sur igl art ecclesiastic e profan, en connex cun maletgs, sculpturas, plasticas della catedrala e d'auters edificis, semischeidan caussas pias cun monsters e figuras cristianas, paganilas e stgiras. Tut quellas representanziuns tschontschan il medem lungatg, sur dil combat denter bien e schliet. Era sin quei intschess sa mo in vast studi explicar senn e valur dellas representaziuns ded artists dils temps vargai cun lur misteris ed isonzas artisticas, tradizion reala e simbolica enten representar ideas, de lur exponer il patertgar personal e communal. Mo dapertut ei igl intent veseivels. El vul scarplir neuadora da mintga fasa, da mintga object d'art, sculptural e tradizional, da usits, praujas e legendas l'essenza, il resultat, la clarezia, la penetraziun dil spért cristian.

In dils pli bials exempels de questa sia stenta ei bein stau siu referat sur la Canzun de s. Margriata, daus 1938 el ravugl dell'Uniu de tradiziuns popularas a Basilea, nua che il scribent de questas lingias era presents, e saviu seperschuader della gronda impressiun che la representaziun della canzun, cantada entras ina

cantadura e 2 cantadurs romontschs, ha fatg sil numerus auditori. La laver entira ei comparida en stampa buca ditg suenter egl Archiv de tradiziuns popularas cul tetel: DAS RAETOROMANISCHE St.-MARGARETHA-LIED.

In plascher aparti per Monsignur Christianus Caminada ei stada la comparida della biala ediziun reunenta tut ses impurtonts studis sur ils cults paganils ensemēn cun quel della Canzun de sontga Margriata: **Die verzauberten Täler, Kulte und Bräuche im alten Rätien**, edida dalla casa editura Walter, Olten, 1961. Cun gronda stenta ha igl autur sez emprau de rabbitschar neuadora la caussa en biala fuorma. Sche buca tut la nova litteratura ei applicada en questa recenta reediziun complessiva, sche ei quei buca de smarvegliar. Igl autur vess stuiu repassar en rigurus studi tut quei ch'ei vegniu publicau els davos 30 onns sin quei vast intschess scientific. Quei vess giu num Vus! Mo era la nova ediziun porta en remarcas in commentari bibliografic considerabel. Quei cudisch de varga 300 paginas cuntegn gronda savida e stenta d'in portabandiera della scienzia de nos vegls perdavons, in monument d'interess e d'attaschadad al sulom patern retic.

Gronds vegn ad esser il tschancun via ch'ei de far per arrivar en tut a sligiaziuns definitivas e generalas. Con grev che quei va de penetrar tras a perfetga verdad, han recentas emprovas de precisar vegliadetgna e derivonza de miedi e text della Canzun de sontga Margriata demussau.

Per recapitular e precisar: tut las scienzias principales ed affiliadas dallas qualas Christianus Caminada ha fatg diever per metter a ferm quei ch'el leva dir e scriver, han en tuts graus vuliu survir alla explicaziun ed alla grondezia dellas verdads cristianas. Mintga scienzia e parts de quellas ch'el ha duvrau e manischau, han schendrau novas enconuschienschas e menau siu spért scrutatur a novas sligiaziuns. Aschia ei il funs solid de sia personalitatd arrivaus ad in scalem che lubeva en sia fuola de savida de trer conclusiuns pregnantas. Monsignur uestg Caminada era stgis sco paucs auters d'en radunonzas e discussiuns tschaffar en cuorts plaids igl essenzial d'ina caussa; era sias scartiras sedistinguau entras pregnanta formulaziun, e sia forza d'abstracciun en plaid ed en scret valeva per ina dellas pli distinguidas qualitads de spért dil defunct! En quei connex astgein nus alla fin allegar ses nunemblideivels priedis, cunzun quels de Nadalnotg cun savens remarcabel cuntegn, pronunziai senza pa-

tos, inschigns ed artifecis linguistics, denton cun fermezia, cun penetraziun, bein entelgeivels tras il venerabel spazi della Catedrala a Cuera, sublim patratg d'in veritabel cau diocesan ed em-prem pastur dellas olmas. Tals plaids savevan mo vegnir dad in um de forza, perschuasiun e speronza enten igl avegnir, d'ina veritabla personalitat.

\*\*\*

Nus vein sapientivamein tralaschau d'allegar ils numerus giubileums de Monsignur uestg Caminada, era buca menzionau en perfetg uorden las numerusas staziuns de sia veta e de sias nominaziuns, era buca allegau expressivamein uffecis en favur de lungatg e cultura romontscha, della scienzia e digl art. Semeglionta-mein vein nus cuschiu sur numerusas honoraziuns d'uniuns e societads culturalas romontschas, grischunas, svizzeras ed exteriuras per ses merets sin tuttas varts d'allegar tut quellas grondas e meritadas renconuschientschas, cunzun la detagliada menziun de siu operar per las pleivs, per igl uestgiu, per la baselgia cristiana e catolica insumma, stuein nus surschar ad ina plema pli cudscheda e versada en materia.

Alfons Maissen